

سلا

.1

لالة خيتي و اختيتي

مال جمرك طفا

و لبارح كان شعال

مال زهرك صفار .. و ذبال

قالت السواني و لخضورا

قال البلوط ف معمورة:

لاله... عروسة

الشامة و الخال و الشفر

الحجبان و ظفاير الشعر

و سالف

تحلم ب حنة و نكاف

و ب الطيفور

يدور... يدور

ف دار اباها... تيدور

تحلم بعريس

يدخل من باب الخميس (1)

و ف راس المون

ثم

يكون اللي يكون

.2

لالة خيتي ... و اختيتي

صغور كان

يمشي لمسيد

ف لقب خبزة ... بلا كديد
و ب الفتوح
يحفظ...يقرى اللوح
و يرشق ليه
يوم يمناك لفقيه
يجري بضحكة مبشورا
يجري ف عقابي و حدورا
ل بورقراق
إيه يا بورقراق
النظرة فيك شهوا
مذاقك لذة...و دوا
و ميتك سكار
تعربد من دار لدار
من باب لمريسه (1)
لدرب اخيار (2)
و ف زناته (2)
تسقي وليدات الحراثة
تقول لمعلم بوزكري
طيب لي خبزي بكري
عولت نسيح ... نتسارا
نشعل الضوف المنارة
ننفض الرماد من كفوف الاو لاد
و نوفي كلمه ب الزيارة
للأموي
مشرط لحنالك...بغاوه كناوي
ب فريخ ... حلم ف الدار
بالشمس...بضو النهار
بلون سماوي
هكا حلم الأموي

